

stri et molti erano amaladi, fra i qual era morto el medico del consolo, et lui sier Jacomo di Prioli amalati. Idio non lo voglii.

Da novo nulla. El Sophi haver hauto gran rota dal fio del Signor che fo da lui morto verso el Cataro; porta la bareta verde; et se diceva de la persona del Sophi diversamente; pur è scapolado. A auto gran rota, et molti del paese de Arbet li sono fati rebelli, et sono corsi et hanno sachizato una caravana de some 50 sede, venia verso Aleppo, ne la qual era uno Francesco Romano, el qual, se dice, esser stà spoliato et toltoli some 12 sede, per quello hanno inteso. Aspectaremo messi de quel Signor, che havere mo più con certeza.

El campo del Signor de Aleppo partì a di 27 per andar a recuperar uno castello toltoli a Chordi ai confini. Subiunge, el Signor tureo si aspecta a l'averta a quei confini per ultimar s'el potrà haver suo fratello, el qual andò zà verso Sophi; ma zudego el sia romaso a quei confini. El formento va calando, et li arcolti va benissimo, purchè la peste non se apiza in queste parte.

*Copia de una altra letera scritta al dito rezi-  
mento copiosa di nove di Turchia, scritta a  
di 25 April.*

A li illustrissimi signori de Cypro, luogotenente et consieri. Se voleti le magnificentie vostre intender le nove de' nostri signori di nostri luogi, zioè che se fa, el soldan Saleminus, el qual è in sedia, à amazato il signor di janizari, che è sopra tutti li janizari, l'ha fatto menar a Burza con bone parole et l'ha amazato; e li janizari inteso come è stà amazato el suo signor, hanno rebelato. Et havendo visto come i janizari à rebelato subito, li soi bassà, li tre grandi nominati l'uno Mustafà bassà, el secondo Arischogli, el qual era gran bassà et capitano del campo tutto, el terzo è Senan bassà, el qual era prima con l'altro suo fradello el soldan Machmeth, à amazà *etiam* suo fradello Choreobei, el qual à pigliato a le bande de Sathalia dentro uno monte in una grotta, el qual hanno menato dentro in Bursa, e l'ha menato dentro de la loza dove el zudega publico, e l'ha amazato avanti a tutti li homeni; et del campo à mazà cinque euxini, et el mondo ha visto et la Porta, et hanno hauto paura, et hanno tremato tutto il luogo. Et vedando questo, janizari hanno rebelato et sono scampà 400 capi de' janizari, et ogni capo de' janizari à diexe, et andono a trovar l'altro fio, che è suo fratello, el qual era con Sophi in Caramania, el qual

se chiama soldan Machmeth, et li hanno fato gran sacramento, et l'hanno menato de Caramania secretamente al passo de Constantinopoli, et ha con lui 10 miara et tre miara de le berete rosse, et ha uno suo fiolo il dicto soldan Machmeth che passa dal Mar Mazor con 20 milia de le barete rosse, che de quelli del Sophi zà fa 14 zorni *etiam* sono passati a Constantinopoli. Ancora non sapemo certo ch'el soldan Machmeth sta in Bursa più de 100 milia persone, et à al Cogno campo, et à *etiam* in altri luogi, et è molto forte, et non ha paura d'altro cha de' tradimenti. Ogni zorno taglia ogni sorte de homeni, che li par più de cento al zorno; el Signor è a Pende-chos et à armata de mar. Le galie, che era al Fisco, sono venute fino in Sathalia et in Scandaloro, et hanno fato assai zorni, et à tolto altri navilli et fuste, et è andà al Fisco, e dice voler murar un castello in quel loco, et à campo da terra. Questo è uno mese che se partì da Scandaloro; quello è seguito non savemo. Qua l'è venuto 4 fuste grosse et voltiza et voleno investir in Cypro. Idio a scapolà il bregantino che è venuto de nocte; el vostro armiraglio à facto ben a venir de nocte, altramente le fuste l'haveria pigliato, le qual steva scose. Non altro salvo missier Domine Dio conserva quelle. Scrita a di 25 April 1513. - Tuto questo ch'el diceva voler murar castelo al Fisco el feva a posta per piar il Churehut; non è andà fin ch'el non se ha messo in le man.

STEFANO AMORATHI  
paratissimo a ogni vostro comando.

*Dil mexe di Luio 1513.*

231

*A di primo.* Introno Cai di XL sier Zuan Barozzi fo de sier Jacomo, sier Andrea Zorzi qu. sier Lorenzo e sier Leonardo Zantani qu. sier Antonio. Cai dil Consejo di X, sier Francesco Falier nuovo, sier Michiel da Leze et sier Zorzi Pixani doctor e cavalier. Savii dil Consejo, sier Zorzi Emo e sier Zorzi Corner cavalier procurator. Savii di terra ferma, sier Gasparo Malipiero, sier Marco Minio nuovo, et sier Piero Trun; e cussi questi introno in Colegio.

Vene, per tempo, in camera dil Principe, a ore 8 1/2, sier Andrea Gritti procurator vestito di panno paonazo a manege dogal con barba, el qual zonse eri sera venuto per via di Po, partì di Ferrara eri per tempo con una barca li dete el Ducha a remi 10, et zonse qui a hore do di note. Et cussi questa matina, senza altra comitiva, se ne vene a palazzo insieme però con sier Sebastian Malipiero qu.